



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o stavljanju van snage Odluke o poklonu medicinske opreme, namještaja i mobilijara

Predlagač: Gradonačelnica
Obradivač: Stručna služba za poslove
kabineta i poslove Gradske uprave
Pravobranilaštvo Grada Sarajevo

Sarajevo, januar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav (1) tačka 2. i tačka 10., a u vezi sa članom 73. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na __. sjednici održanoj __. __.2023. godine, donijelo je

(Prijedlog)

**Odluku
o stavljanju van snage Odluke o poklonu medicinske opreme, namještaja i mobilijara**

Član 1.

Ovom odlukom stavlja se van snage Odluka o poklonu medicinske opreme, namještaja i mobilijara („Službene novine Kantona Sarajevo“, broj 2/21).

Član 2.

- (1) Zadužuje se gradonačelnica Grada Sarajeva i Pravobranilaštvo Grada Sarajevo da, svako u okviru svojih nadležnosti, poduzmu radnje na raskidu pravnih poslova proisteklih na osnovu Odluke o poklonu medicinske opreme, namještaja i mobilijara.
- (2) Zaduženje iz stava (1) ovog člana Odluke naročito se odnosi na raskid Ugovora o poklonu medicinske opreme, namještaja i mobilijara, broj: 01/04-04-6432-2/20 od 19.01.2021. godine, zaključenog između Grada Sarajeva, kao poklonodavca, i Medicinske asocijacije BIMA, kao poklonoprimca, kao i na povrat pokretnosti navedenih u članu 1. predmetnog Ugovora u skladu sa specifikacijom (Potvrdom/Zapisnikom o primopredaji), broj 01-14-2729-1/18, priloženom uz Ugovor.

Član 3.

Ova odluka stupa na snagu danom donošenja, a bit će objavljena u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo,

OBRAZLOŽENJE

PRAVNI OSNOV

Pravni osnov za donošenje Odluke sadržan je u odredbama člana 26. stav (1) tačka 2. i tačka 10., te odredbama člana 73. Statuta Grada Sarajevo.

Odredbom člana 26. stav (1) tačka 2. i tačka 10. Statuta Grada Sarajevo propisano je da Gradsko vijeće donosi odluke, druge propise i opće akte i daje njihovo tumačenje, dok je tačkom 10. propisano da Gradsko vijeće upravlja i raspolaže imovinom Grada.

Članom 73. Statuta Grada Sarajevo propisano je da imovinu Grada čini pokretna i nepokretna imovina, a imovinom se smatraju stvari, prava, novčana sredstva, te nosilac raspolaganja imovinom Grada Sarajeva je Gradsko vijeće.

RAZLOZI ZA DONOŠENJE

Dana 30.12.2020. godine Gradsko vijeće Grada Sarajeva donijelo je Odluku o poklonu medicinske opreme, namještaja i mobilijara, broj: 01-GV-02-1290/20, objavljenu u „Službenim novinama Kantona Sarajevo“, broj 2/21, kojom Grad Sarajevo poklanja Medicinskoj asocijaciji BIMA u BiH medicinsku opremu, namještaj i mobilijar namijenjen za korištenje u humanitarne medicinske svrhe, te je istom Odlukom gradonačelnik Grada Sarajevo ovlašten da u ime Gradskog vijeća potpiše Ugovor o poklonu.

Na osnovu navedene Odluke, dana 19.01.2021. godine između Grada Sarajevo, kao poklonodavca, i Medicinske asocijacije BIMA, kao poklonoprimca, zaključen je Ugovor o poklonu medicinske opreme, namještaja i mobilijara, broj: 01/04-04-6432-2/20, te je kompletna oprema prema specifikaciji, zaključno sa rednim brojem 132, predata u posjed poklonoprimcu.

Grad Sarajevo je medicinsku opremu, namještaj i mobilijar, koja je predmet gore navedene Odluke i Ugovora, dobio na temelju Ugovora o poklonu broj: 01-14-2728/18 od dana 08.05.2018. godine, zaključenog sa Turskom agencijom za saradnju i koordinaciju – TIKa – predstavništvo za BiH Sarajevo.

Odredbama člana 2. navedenog Ugovora o poklonu propisano je da „**Poklonodavac je saglasan da poklonoprimac može dati na korištenje ovu doniranu opremu, namještaj i mobilijar Medicinskoj asocijaciji BIMA u BiH, koja će opremu koristiti u humanitarne svrhe**“.

Navedeni Ugovor o poklonu zaključen je između Grada Sarajeva i Turske agencije za saradnju i koordinaciju – TIKa – predstavništvo za BiH Sarajevo, a na temelju kojeg je Grad Sarajevo postao vlasnikom predmetne opreme, namještaja i mobilijara, nije bio prezentiran Gradskom vijeću Grada Sarajevo niti priložen u materijalima prilikom donošenja Odluke o poklonu medicinske opreme, namještaja i mobilijara broj: 01-GV-02-1290/20 na sjednici Gradskog vijeća Grada Sarajevo održanoj dana 30.12.2020. godine.

Istim Ugovorom o poklonu je jasno i precizno definisano da se oprema može dati na korištenje, ali ne i da se može dalje sa istom raspolagati niti da se može poklanjati trećim licima.

Obzirom da je Gradsko vijeće Grada Sarajevo očigledno dovedeno u zabludu prilikom donošenja Odluke o poklonu medicinske opreme, namještaja i mobilijara, broj: 01-GV-02-1290/20 na sjednici održanoj dana 30.12.2020. godine, to se prijedlog ove Odluke dostavlja Gradskom vijeću na nadležno razmatranje i odlučivanje, kao organu Grada nadležnom da upravlja i raspolaže imovinom Grada, kao

i radi davanja ovlaštenja gradonačelnici i Pravobranilaštvu Grada Sarajevo za poduzimanje svih pravnih radnji, svako u okviru svoje nadležnosti, u cilju raskida pravnih poslova proisteklih na osnovu Odluke o poklonu medicinske opreme, namještaja i mobilijara, broj: 01-GV-02-1290/20 od dana 30.12.2020. godine, a što se naročito odnosi na raskid Ugovora o poklonu medicinske opreme, namještaja i mobilijara broj: 01/04-04-6432-2/20 i povrat pokretnosti navedenih u članu 1. predmetnog Ugovora u skladu sa specifikacijom (Potvrda/Zapisnik o primopredaji, broj: 01-14-2729-1/18).

FINANSIJSKA SREDSTVA

Za realizaciju odluke nisu potrebna dodatna finansijska sredstva.